

Pasangan suami isteri didakwa edar, miliki dadah

SIBU: Pasangan suami isteri yang dipercayai menjadi dalang sindiket pengedaran dadah sejak 2015, dihadapkan di Mahkamah Majistret di sini, semalam atas pertuduhan mengedar serta memiliki dadah berbahaya.

Bagaimanapun tiada pengakuan diambil daripada pasangan suami isteri terbabit yang dikenali sebagai Tie Teck Hock, 52, dan Lee Chee Fei, 45, sebaik pertuduhan dibacakan dalam bahasa Foochow di hadapan Majistret Oon Kork Chern.

Tie bagi pertuduhan pertama didakwa atas pertuduhan mengedar 1,030.80 gram Methamphetamine di kaki lima sebuah premis makanan di Jalan Pedada pada 12 Jun 2025, jam lebih kurang 10 malam.

Bagi pertuduhan kedua, Tie dan Lee didakwa bersama



DIDAKWA: Tie (kiri) bersama Lee (depan) keluar dari kamar Mahkamah Majistret Sibu, semalam setelah didakwa atas pertuduhan mengedar serta memiliki dadah. — Gambar PDRM

mengedar 6,055.90 gram Methamphetamine di sebuah stor bawah tangga sebuah rumah di Lorong Permai Jaya

9D1B1 kira-kira jam 10.45 malam, pada hari yang sama.

Pasangan suami isteri didakwa edar, miliki dadah

► Dari Muka 1

Untuk kedua-dua pertuduhan ini, mereka didakwa melakukan kesalahan di bawah Seksyen 39B(1)(a) Akta Dadah Berbahaya (ADB) 1952 dan dihukum di bawah Seksyen 39B(2) akta sama, yang membawa hukuman mati mandatori atau penjara seumur hidup serta tidak kurang 12 sebatan, jika sabit kesalahan.

Sementara bagi pertuduhan ketiga dan keempat, pasangan terbabit didakwa bersama memiliki 2,078.90 gram Ketamin dan 2,022.15 gram Nimetazepam di tempat, tarikh dan masa yang sama.

Pertuduhan pemilikan dadah itu dibuat mengikut Seksyen 12(2) ADB 1952, yang dihukum di bawah Seksyen 12(3) akta sama, dibaca bersama Seksyen 34 Kanun Keseksaan, yang memperuntukkan hukuman denda tidak lebih RM100,000 atau penjara tidak melebihi lima tahun atau kedua-duanya sekali, jika sabit kesalahan.

Tie sebelum ini dibebaskan dengan jaminan polis pada 26 Jun selepas tamat tempoh reman lanjut tujuh hari, namun telah ditahan semula di bawah Akta Dadah Berbahaya (Langkah-Langkah Pencegahan Khas) 1985.

Lee pula dibebaskan dengan jaminan polis pada 24 Jun selepas tamat tempoh reman lanjut empat hari, namun turut ditahan semula di bawah akta sama.

Mahkamah menetapkan 22 Ogos ini untuk sebutan semula kes sementara menunggu laporan kimia kes.

Tiada jaminan ditawarkan dan kedua-dua tertuduh diperintahkan untuk terus direman di bawah Seksyen 41B(1)(a) ADB 1952.

Pendakwaan kes dikendalikan oleh Timbalan Pendakwa Raya Nuralisa Natasha Nazrulzam sementara pasangan terbabit diwakili peguam Reena Chong.